



蓬客文州

海虞趙士春著



重修浚儀世祠記

萬曆丙申文毅公即世一時府縣朱公燮元而
下擬以專祠請于朝不果行迺為捐俸建祠

于居之西偏上自松雲公永違公益齋公至文
毅公凡四代咸設主焉嗣後伯父刑部郎中玄
度公贈中書舍人升度公先中憲大夫四川叙
州府知府文度公相次入祠越六十餘年而棟
宇頽敝幾于震凌矣士春兄弟謀葺而新之費

無所出又不可煩我族人乃然兄弟間許畝輸
費不足則棄產繼之經始于辛丑五月踰年而
訖功改建正屋三楹以奉神板櫨桷修整錯以
丹牘几筵如在也東為寮房井竈司香火也西
為廳事置二碑焉一為譜系圖一為瞿元立先
生祠記餽于斯聚族于斯也亭雖小存舊制也
門有額題曰趙文毅公家祠以文毅重也中
奠高闕前俯清池規撫備列余兄弟因相謂曰

是宜有言以詔後人余惟松雲公之讓產永違
公之訓子益齋公之莅顛拒分宜相咸可師法
然大端止此爾至文毅公盛時諸事更僕難數
先憲每向余樂道之蓋光明俊偉之概軒然
如在耳目前自中憲云亡者舊凋盡無復有親
見文毅公眉宇者矣更數十年將并其聞者而
不可得雖載在史冊而稱道無聞焉此豈非後
起者之責哉詩曰以似以續古之人夫古之

未猶可續而况本支一脉者乎思其人則莫若
誦其言誦其言則莫若行其事今文毅之言不
具在乎一疏糾奪情則猶程朱以來秉禮明道
之言也再疏請寬江南田賦則猶韓范司馬輩
先憂後樂之旨也且我趙氏不云自宋室乎今
誠於宋名臣中釋偉人鉅公而師之學程朱之所
學志韓范司馬之所志處則大儒出則名世德
修于身而功加于百姓此所謂世濟其美者也

我祖宗令德貽謀行使鄉邦誦之天下誦之矣
君子之澤五世能如是文毅之道百世弗墜可
也如或不然讀書不法聖賢仕進不圖膏澤終
其身疲於汨沒而不之恤以視文毅公行事譬
猶高山在望而蟻垤自安萬頃當前而蹄涔自
樂雖復丹碧歲加牲牢日薦神其吐之矣於祠
乎何有哉嗟乎今後進不聞此語者久矣哲人
不世出而必以文毅之道期之余亦自咲其言

迂也雖然余老矣痛素志之成虛猶欲引古
人以自責也庸敢薄待吾後之人而不以平生
之言詔之乎若夫時祭之共宗法之講苟得其
人無難也余故不書、余之所望于後人者以
為之記俾有所興起焉

遷客文州

海虞趙士春著

李氏重修賢良貞節祠記

為換世祠記作首

余年十六七受業于緝夫李先生先生昆季則
有仲華武備諸文學時相過後而余講習之暇
獲隨先生杖屨所到見西城蜿蜒有屋三楹繚
以垣墻號賢良貞節祠先生指謂余曰此吾李
氏發祥之始也其後先生偃蹇無所遇而先生

之子象璧崇禎己卯舉于鄉旋卒未幾世事變
革嗟乎俯仰四十餘年間師門寂寞僅存遺書
數卷于子姓之家而余亦衰遲危苦終歲避人
雖西城咫尺無復過而問焉者矣昔所謂賢良
貞節祠者其能無風雨鳥鼠之感耶今年春仲
華之子○率其族人鼎新之因請記于余且
曰是役也庀材鳩工謀之數年而後即緒向之
老屋三楹增庫易地廊廡修整旁治大室為祭

畢燕閒之所而綽楔門額一如故事嗚呼賢哉
夫尊祖故敬宗敬宗故收族收族故能教其子
孫以無替奮德自今以往李氏之子孫其有入
祠儼然克續前徽者矣吾師之門當復有興者
雖然不獨此也父子君臣夫婦之倫是謂三綱
其以綱維世界一也婦之事夫有不幸而絕命
以從夫地下者有不幸而守身弗辱如詩咏柏
舟之篇者古云節烈之婦生死雖殊志未嘗不

一也今攷李氏舊誌載李景中于洪武初舉賢
良方正任靈臺死之日婦徐氏年二十六誓不
食它姓撫其孤既成立矣復死于寇再撫孤孫
壽九十三而終正統丁卯聞于朝因勅專祠祀
之隆慶中有司表其門曰賢良貞節祠夫賢良
之名賴節婦而重若樵讀以下代有聞人則皆
節婦之志貽之也推此志也以為子則孝以為
臣則忠以書于冊則彤管生光以風于世則末

流知媿蓋二百年来祠倚山麓儼然與天神人
鬼竝列祀典夫豈偶然者歟方今倫紀蔑裂俗
習淫哇萬一有治先教化闡發幽貞者過視則
下茲非其地歟然則祠宇之修寧惟李氏一家
俎豆憑之將虞之教化行而風俗正於是乎在
區、世俗所稱蟬聯富貴何足論哉歲辛丑新
正人日記

卷之六

亡妹錢母趙孺人行迹

先妹歿距今三十有五年即委殯荒郊近三十年矣今年春錢甥延宅以御史閱視茶馬貽書于余曰甥不天六齡失恃今幸奉母遺體銜命秦隴間每痛母骨未安雖風塵鞅掌未嘗敢忘窀穸大事所恨母之音容如在影響其何所稱述以請之當世文章家惟舅為我圖之余不忍辭迺為叙其大略妹姓趙氏先曾王父廣東少

參益齋公之曾孫女先王父吏部左侍郎謚文
毅定宇公之孫女先父中憲大夫四川叙州府
知府文度公先母累封何太泚人之長女也嬪
于錢為邑庠生今封翁嗣聖君之室而湖廣道
監察御史秀峰公之孫婦湖廣憲副仍峰公之
介婦也我趙氏遷自澄江與錢氏世為姻連以
故憲副公為季子求婚先中憲以妹歸焉太淑
人之姪妹也七月而生體弱甚絕憐愛之比長

姆師之訓以及絲枲鍼縷無或不勤也既嫁合
二族之美憲副公夫人於妹為從堂姊妹恪共
婦道賓祭盥饋不以親故少懈也嗣聖君貴游
閉戶鈔錄盈箱妹夙夜黽勉以相之左右媵御
唯意之從未嘗少忤顏行也夫以妹之婉嫻靜
專得于家門柔嘉泚亮協于上下而又承藉門
閥身不操井臼之勞口不煩旨畜之問無非無
儀考祥錫福固意中事耳然而竟夭折以死何

也猶記戊辰秋余下第里居妹乳得男甫四日
一夕五鼓扣門聲甚急曰妹以疾亟相招披衣
往視則固無恙但作永訣語曰醫謂我不救弱
子稚女兄為我善視之退而徵諸醫曰是血隨
氣壅虛腫徧體法不可治復徐進察之目光炯
然語音琅琅然也則謂可幸無恙越兩日竟不
起嗟乎終風之暴行路傷之此先中憲先太泚
人之所以流涕歎息痛悼無已時者也妹歿後

嗣聖君不復娶子女孤露時留外家撫養太
淑人經營婚嫁曰聊慰吾女太泚人女子子遠
嫁者二人曰使汝姊在不使吾室中有無可告
語之歎太淑人間有弗愜于心曰唯吾女能開
解吾意今何可復得蓋太淑人之繫思于妹者
終身如一日也妹善當母心如此可謂孝矣妹
操家未久棄孤童甚早篝火授經固所不暇然
克有令子以亢厥宗珠光璧輝發祥有自是皆

妹之懿德高于身而昌于後也妹于立家之道
可謂成矣然則妹雖不究于年夫何憾余所竊
念者余兄弟姊妹同母凡七人肩相隨也少時
扶床遶膝嬉戲謹逐彷彿如昨今雖凋落過半
又如余之老病惛忘而呼天呼父母之念時在
胸臆間蓋我先中憲先太淋人之深思痛惜于
妹者如親其愴然之聲與悵然之色也是用追
繹一二并書其垂絕語言以授之甥俾以告無

窮之哀而圖不朽之存庶彤筆燁煌偕命書光
寵妹有餘榮焉以是報先中憲先太淑人于地
下其亦少慰矣哉妹生于萬曆辛丑二月二日
歿于崇禎戊辰九月几日得年二十有八子男
二人延宅壬辰會試榜發猶襲余家姓繼疏歸
本姓見任江南道監察御史差巡按陝西茶馬
娶張氏某女一歿女二人一歿一適某孫男女
凡人今以某年月日卜葬妹于某山某原延宅

將具疏請假從事以乞銘故預為論次如右昔
壬寅年三月日兄士春謹述

外舅黃府君合葬墓誌銘

余疇于世久矣出任日淺固勿論居恒扁側默
坐雖經旬日戶外之屨未易一二數也獨憶少
壯時遭逢偃蹇唯我外舅方堂府君時以慰勞
率三五日一過余余夫婦輒進觴酒互為笑語
移時而別如是者幾二十年以故府君念余甚
懇而余之知府君亦最悉也今府君與外母張
令人合葬有日矣余安得無言乎府君姓黃氏

諱儀玄字耕菴別號方堂常熟人萬曆甲戌進
士雲南大叅潤襄公之第三子母誥封碩恭人
府君少隨大叅公讀書惠州官舍能自刻勵既
淹黌序久之遂入南雍天啟辛酉偕余試白下
旋棄去崇禎己巳訪先中憲于蜀登岷峒而歸
乙亥哭先室丙子余計偕北上府君送之吳門
丁丑余及第留京師是冬寓書告訣而卒令人
姓張氏建寧郡守端巖公曾孫女光祿署丞三

洲公女余初婚黃氏令人尚未有子於坊橋宅
中闢書室館余晨夕膏火令人實視之先室歿
所遺二子一女令人憐念倍切及令人之耄也
余破家伏處不能修一七之養傷歿府君忠信
質直喜為人排患釋難風雨晦明奔走弗輟故
勞悴成疾令人凝厚少言性溫然無所怵始哭
女繼又哭子坦、舒、終享上壽至其孝奉願
恭人均視三子如已出婢僕婦如無違言葵衣

舊裳無改度此今人之德克相府君者矣若府
君至性固自有過人者府君家有先世夙憤大
叅公歆洒之而不得一日出手錄舊事數紙示
余曰吾子幼不堪告語由此所以志也晚歲兄
弟凋落隻身支門戶於猶子輩將蕩尤亟一日
以三命之說徧推諸姪語余曰凡吾所以厚望
若輩者非直以吾兄弟之故吾先人有耻未雪
實式憑之以大吾宗而光吾墳墓蓋不啻日夜

以笑也今府君歿三十年諸子姪績學懷文未
即振起何耶余惟自昔仁人志士睽懷家國之
際而壇壝不伸願領入地者多矣然而追日虞
淵逝木滄海其精誠故昭回天壤間匹夫一念
亦猶是也府君子爾祖爾父能念之矣仁孝之
祉必貽其子孫夫又豈遠乎哉府君生萬曆丙
子年月日卒崇禎丁丑年月日年六十有二今
人生萬曆丁丑年月日卒順治己亥年月日年

八十有三子三人長士祐邑庠生府君痛幼弟
虞卿早逝多遺孤抱以為子次士鼎邑庠生令
人出順治甲午年卒次士登側室出女二人長
嫁士春誥贈宜人令人出次嫁其側室出孫男
八人曾孫男三人府君先葬興福祖塋旁順治
丙申起厝殯宮今以康熙二年十二月十一日
合葬于此山葬過井之疑字歸而士祐特屬銘
于余余老矣樞塞彌甚媿無以報府君則為書

府君至性以藏諸幽以誌諸後人俾旦暮遇之
于杯圈手澤間其亦府君之所樂聞者乎銘曰
余聞大參公之將貴也其封君間溪公夜扣西
城鼓祠有異比丘實告其祥今府君孝誠所感
神將啟之矣維遲久庸何傷嗚呼惟昔携手萬
松之岡今卜其鄰墓谷豕堂印須哲媛白首相
莊既固且安後人之慶歲祭毋盬冬下澣日子
婿趙士春百拜頌

大司成贈詹事許公夫人孫太君墓誌銘

余少侍先中憲側聞先文毅公之即世也有家人子跳梁之事一時舉幡傳檄訟言當道則有先文毅及門士子柔孫先生少微許先生實為倡首余小子心志之其後邑中以庶常起家繼先文毅之後為大司成石門許公即少微先生之子而其夫人孫氏則子柔先生之息也兩家世誼余小子益心儀之司成公久矣戈庄分茲

康熙癸卯冬謀合窳焉其子蘭陵大叅授余夫
人行狀余曰得而敘論之夫人姓孫氏其先自
考功郎後為虞望族至子柔先生號名孝廉夫
人生而端慧子柔先生奇愛之為擇婿歸曰故
公方公為諸生時夫人晚簪珥佐膏火無難色
蓋已卜夫子非長貧賤者已而公以進士受館
職夫人不以貴故驕事其翁少微先生存歿唯
謹而又痛子柔先生之歿于遠宦也奉母時宜

人及友愛二弟特甚又以餘力解推調給恩及
內外一如公意中事生卒一至京邸旋為公置
媵侍而身留家中綜內政崇禎丁丑公任南祭
酒夫人浮江赴署宦游差快未幾公以十年前
制詞橫受指摘悒悒不得志而夫人意亦少慙
矣享已公補尚寶丞夫人力挽不從遂殞都門
素車南下夫人憑棺慟絕雖孫行滿前破涕無
後越四載竟卒或者謂公以詞臣久次駸駸乎

通顯矣顧不即相用迺以閣疏鐫級歸里比補
官之日公已抱病不支迺復強起供職殿陛間
勤勞死事是皆足為夫人惜者嗚呼是未可與
論世也夫自天啓瑞燄後門戶齟齬殆無虛日
其有室家私語為牛衣之歎者多矣公獨翱翔
正人間再領藩封一較禮闈泮列清華譽問休
暢而夫人被翟茀之榮介石渠之俸因以竭誠
孝敬推恩族黨謂非適逢之盛歟固臣之發難

也以梁溪高忠憲為言忠憲之蹟誦法在百世
夫忠憲賢則褒揚忠憲者可不謂賢乎是當日
閣疏借端詆公而實推公于聖賢之域也其于
公何傷萬一哉若壬午玄甲申之變年餘事耳
公以廿載侍從獲奉符寶于法駕之前密通天
顏而回以考歿于鐘虞晏然之日所得不已多
乎然則在公可以釋然而為夫人者亦可以無
憾矣士春丁丑通籍出山陽塗山夏公之門實

公辛未闈中所取士門墻餘澤霑及桑梓款而
公之在朝也余方淪躋公車以故不及見公行
事而但能于家門世誼追繹舊聞然則載筆以
書子柔先生之有女與少微先生之有婦真余
小子事也是用于夫人之銘不獲辭夫人生萬
曆某年月日卒順治某年月日年若干子二琪
恩蔭未仕瑤即蘭陵順治壬辰進士四川分守
道叅政夫人前封安人今以子恩贈太淑人其

它詳司成公誌中銘曰單門女士譬彼幽蘭零
傳風雨茲聞寶難夫人之生內外鼎貴為名父
子為鉅公配雞鳴味旦爰及辟雍絳帳在堂副
笄石宮世運瀕革迎極而哭保全令名亦又奚
憾湖流湯之從公歸藏綿千百祀長發其祥昔
康熙二年臘月日內下眷晚生趙士春拜撰

三峰千華裕禪師塏銘

順治丙戌秋三峰大樹證公示疾丈室適余入
山聲鐘集衆付法于首座斷津諱濟裕師師旋
嗣法席改號千華甫逾年魔難交作越三載再
搆大獄以余之與聞記別也并螫及之比得白
師已憤悒成疾竟死山中議者謂師孤峻少容
於世事不能通解故罹斯禍噫是未足病師也
師姓李氏楚黃梅人風骨嶮削語訥不出口

少習苦行嘗為余言叅竹篔話得熱疾於瞶眩
中見白光如輪神識隨往忽念大事未了汗出
而甦既紹心印慨然有五百人過堂之願嗚呼
又豈知道成而謗集一旦波旬塞路度生之念
長付悠々可悲也已憶辛卯難作余語師曰杖
笠隨身何必三峰為師于時有不釋然者余頗
疑之雖然又何必不三峰也師歿至今殆十年
諸方禪道彌熾王舍城中金輪座上延頸拭目

幾徧方袍此其末流必有以夸大為福報屈折
為機用者矣如師之孤峻少通將為叢林大戒
但念古佛儀軌顯晦隨時夷險一致豈必皆拈
香北闕賜額名山者耶故師之顛躓不偶蓋其
遭逢然也師無庸咎人後之論者亦無咎師為
可也自師早世主三峰者淨慈岳公公遜錫南
屏命其徒募造塔院于峰之前麓又囑師鉢囊
于其門人道智以辛丑某月某日窆師遺蜕乞

銘于余岳公之用意良厚矣師室中偈頌直截
舉揚宜書燈錄以俟後人銘曰師自五祖來紹
三峰邂逅孤虺冥默告終法輪永真靈骨斯封
山月皎、海日曠、萬古安禪無縫塔中

邵公輿封翁暨周安人墓表

歲戊戌封翁邵公輿先生上其母夫人九十壽
觴時先生子一燈號無盡成進士官中翰以使節抵家
五世一堂光耀閭里里中親黨以壽母名篇什
者不可選紀咸曰善人也。是宜有此。今年三月
先生卒。先是無盡任刑部主政得請終養。歸再
暮矣。謀合葬先生于周安人之墓。而以表墓之
文屬余。一為表其行。余謝不敢當。雖然其行事。

則有可表者焉。先生^諱梁字公輿，別號雪樵。其先自范陽徙河南，隨宋南渡，再遷而為常熟人。嘉靖以來，有北虞孝廉麟武，駕部茂齋文學。後先^稱儒林祭酒。先生少從茂齋公受經，旁通性理綱目諸書，攻苦鏃礪，庶幸起家名場。而生產日削矣。遭時不幸，一遭危疾，再罹死喪，冤訟繁興。歲行告祲，遂棄經生業，糊口塾師。卒能左支右吾，俾老無廢養，幼無廢教，昆弟無終瘡，而

孤嫠無失所，大事克舉。先廬晏然，蓋至五十以後，無盡薦賢書。先生始獲買地葺茆，嘯歌自適。母子耄耄，以永天年。識者猶惜其優游之日淺，跋賣之日長也。安人及筭而歸，執勤處約，習為故常。其于孝友慈惠，凡先生所欲為者，如鼓篋之應，不謀而同然。今讀其垂絕數語，鞠子操家，荼苦百端，令人愴惻。繇斯以觀，先生壯歲之遭逢，為何如哉！夫以遭逢如是之難，而能忘其饑

寒之患。以。黽勉于仁義之塗。門內門外。無或間言。是故人盡而天隨。德修而福應。此所以玉子于成。而食一經之報于暮年者也。嗟乎。父母之于子。一身也。譬木之繇根而幹。繇幹而枝也。今夫天之生物。不獨以雨露生之也。必先之以沍寒霜雪。厚蓄其氣。而敷榮繼之。先生夫婦之所處。則印氏霜雪之晨也。迺能以為善一念。長養其生意。于摧殘剥落之中。遲之又久而後雨濡。

露潤。發榮于後人。顯聞于當世。一旦鄉閭。艷稱。行路嗟歎。謂非先生夫婦。德厚所貽。其可乎。若自今以往。其益培之。溉之者。豈有它哉。夫先生所錄性命格言。前修懿行。具在。惟爾後人。踐履而光大之耳。然則無盡所以表其親者。不徒在區區文字間。而况余之無文也哉。此固無待余言。而竊欲以余言。送之者也。

洞庭東山周君墓誌銘

君姓周氏名紹恭字公讓別號謙予其先自宗
南渡避兵家于太湖之東山曾大父西泉翁翺
豪雋結客譽傾一時大父石川翁素父體川翁
孫才兩世皆挾貲江淮間體川翁樂下相風土
因托業焉體川翁俛仰拮据家用饒起願能時
時行度外事君生而端重貌豐偉雖少長奇羸
間事親克殫孝道再世下相與時廢著心計優

長而推多取少不為苟得崇禎辛巳歲祲下相
東北圩數百戶罄以待盡君為賑貸全活之嘅
然嘆曰吾其不可久羈此乎迺驅車南還借廩
虞邑未幾而世變作矣識者謂君去就之明不
獨在治生握筭間也君每念體川翁之置田供
僧也故于虞之福城塔出鏹助工其它津梁衢
路苟可利人無不襄厥成也又念體川翁肩吳
縣賦役以甦山氓也故于閭黨饑饉樂加賑卹

歲辛卯設糜飲于福城塔者五日不殊下相故
事至于舉火挾纊歲不下數什家而貧交舊戚
生給之食死與之轉其子女仳離已鬻主家贖
而歸之俾就成立者凡二姓焉君可謂善人長
者矣鼎革後直指旌君行誼君辭之曰我齊民
也無它竒行何以寵命為迺舉疇昔資生之計
一聽之于若孫日惟籜冠竹杖徜徉山水退而
築室蒔花雅好手談紋枰坐對欣然自喜庶幾

達人逸士之風焉君生于萬曆壬辰歿于順治
辛丑得年七十配葉孺人繼葉孺人咸修婦道
以相君于成家訓子子二人國瑚國璉璉先君
卒女一適其孫男九尚銘尚鑑等孫女五曾孫
男三婚娶皆名族今國瑚等以康熙元年九月
某日葬君暨元配葉孺人于寒山祖墓之次蓋
君之姪孝廉君之狀君也如是余惟治之必有
亂民之樂生而不免于啼號捐瘡此皆事之必

至而造物所無如何者也於此有人焉情非父
兄位非司牧惻然解橐中裝推餘力而振之此
柱下史所云損有餘以補不足者天道然也夫
匹夫行善通于財成輔相之道而況其大焉者
乎今如君之卹凶灾篤親舊舉不數事然可
以觀君之用心矣洞庭東山四十年中所稱富
儼程卓者始未嘗不雄視郡邑不旋踵而銷落
無聞也君之貲雖不逮遠甚更歷兵燹獨無毫

毛之戚而晚節優游享子姓守成之福此亦可
以觀君為善之報矣而又烏足盡君為善之報
也哉夫樂道人之善以勸誘方來雖衰病如余
者未可以讓也是用諾其子若孫之請而為之
銘銘曰長天遠波君所梅丹崖碧嶂君所歸摩
牽車牛別有奇匪殖其貨殖我慈哀鴻涸鮒絲
口碑修之于身德乃滋貽爾子孫福孔多銘以
信之夫何悲

屈毓庵像贊 醫家屈良生之父

余年來善病夏秋間苦瘡痢良生屈兄投刀圭
輒效因謂良生勉乎哉術益精為德且滋大良
生暨然曰惟屈氏累世業儒先人毓庵公苦志
弗售晚以學行聞鄉里而小子謬用術鳴無乃
慝乎余曰不然士君子處世要當有濟于斯民
而已矣今之經學起家者一行作吏貪如狼猛
如席歲殺人不下千萬而彼治業岐黃者願能

歲活人以什伯計繇君子觀之必不進此而黜
彼也然則毓庵之志謂良生實光大之可也廼
即毓庵遺像而為之贊曰聖賢之學本以及人
天降喪亂孰圖我民誦說孔孟發丘摸金萬家
之哭半通之綸猗歟先生衡巷幅巾厥啟胤子
假術行仁起其札瘥療其顰呻殊途同歸儒效
彰明太丘之德再世彌新庶食其報為公為卿

日用警語

偶讀晁文元七審温公解禪六偈輒書
日用數語粘之案頭隨緣警醒期于純
熟庶身心間得大自在

克己以利生是名檀波羅閑邪能守正是名尸
波羅敬敏作修持精進波羅是含弘而順受羸
提波羅是息妄歸真空禪波羅密是轉物生大
慧般若波羅是通脫不拘常波羅名方便廣大

克擔荷是云願波羅堅剛敵魔燒是云力波羅
圓明常了徹智波羅蜜是一念一事間具足十
地法六度并萬行欲仁斯仁至不改凡夫身圓
成三大士曷用苦談空何須立文字稽首十七
師願我生：世依此勤修行不怖於生死

晝箴

仲尼大聖時哉微服矧予不辰強食弱肉忍之
又忍唾面奚惡守口降心聊以自牧

夜箴

昔人睡裏問主人公是義不然放下全空宵爾
三昧况子六通吾學無生睡夢之中

三教唯心銘

致知惟精依仁惟一慎獨為功觀化為樂完公
乎此心此理是謂儒之太極
不留一物不捨一法無相實相何生何滅廓徹
乎此心此性是謂佛之圓覺

香、冥、悅、惚、常無常有藥靈丹結渾合
乎此心此炁是謂道之金液

周繭菴像贊 洞庭東山周吉甫

萬有芸芸以道為宗道之所在雖纖而鴻昔聞
橘叟亦云壺公茲繭菴者取義攸同厥有哲人
安住其中探古今之幽蹟究元化之始終彼震
澤浩淼七十二峰之巖嶽曾弗足蒂芥吾太虛
之室而又奚必曳杖而他從益優哉游哉坐磐
石蔭長松但覺眉宇之際超然凌顥氣而駕天

風

先大夫詩集後

先中宣以天啓辛酉入仕籍崇禎辛未歸自蜀
中辛巳捐館舍二十年间作詩不下五百餘首
手自刪削存百六十首自辛巳迄今藏篋中者
忽又二十年矣今季弟付劄劄士春手較再
三伏見先君之詩其于鋪揚典禮感念世澤忠
孝惻怛之思可以教它如渡洞庭上夔峽交游
行役從容篇什無忝盛時遊宦然而五十年前

詳于南廣之章五十八後寄懷詠古近欲與巖
栢谷飲者為伍思其志意可憫愾然而歎矣先
是丁丑春謀梓前編有陳眉公先生序及今久
失去士春淺瞽不敢妄稱先德但惟先君仕不
廢學老猶擁書故所作詩源本風雅規極盛唐
以俟後世當必有知之者歲在上章困敦攝提
之月男士春百拜謹識

書五姑事

余生而患貧三十年前貧于遇，可幾也故緩
急之呼猶通于薄俗三十年後貧于時，不可
為也故賙給之誼遂絕于人間已乎已乎其能
不極今而追昔乎夫昔之賙我者則有婦顧氏
五姑共一人也姑于父毅公為第五女生而明
患有出塵之姿善談論通曉大體持身操家動
有軌法閨閣中未見其比顧氏于余相好也既

而相尤余不欲著其事但念公車之後泊姑易
簣之日前後所贈近二千金顧氏無親生子女
詩所云他人入室者在姑祇為剩物而余之得
此則已厚矣暇中念無以報吾姑擬割姑所贈
尤墩田十畝頃治半入北菴供香火半入叢林
資冥福死者有知稍白吾心云爾嗟乎今之時
倘復有如姑者余暮年學道不至有終窶之歎
矣而弗可得也然則計將何之老氏云治人事

天莫如嗇于身可以自養嗇于家可以無求
然則緼袍可以禦冬晚食可以當肉以是抗末
流之志節存道人之家風不亦善乎癸卯孟冬

日記

保間堂續集目錄

卷之二 蓬客詩冊

五十六首

春雪鎖春花四首 又口占一絕

丙度上巳二首 晴風冷拂水二首

牡丹二首 贈某和曲園居二首

芍藥 送陳義扶會試

玉峰向道次韻 贈李賓侯

贈陳天侯 楚中艾僊梅見訪

錢金吾母七袞

壽李師母八袞

仲冬拂水石上

己亥生日

庚子新正二首

聞呂貞九遠行三絕

贈宣城胡信山

吾廬

春暮感懷四首

次子北行採桑子

調四

次辟穀道人小松源約二首

次子北行接和甫建昌前之昂贈章和約

登莫釐峰

望縹緲峰

嘲吳東前輩

前之昂六袞二首


讀梁溪野乘解嘲二絕

答南屏和尚

題朱昂之小像

雷二首

題錢牧齋初學集五絕句



Handwritten markings on the right edge of the page, possibly bleed-through from the reverse side. The markings include a series of wavy lines and a small, illegible mark at the bottom.

